

Pantun Empat Kerat (Pelbagai)

- 568 Lemak kelah pindang linang,
Masih hangat makan di Rasah;
Ingat Allah sewaktu senang,
Kita diingat waktu susah.
- 569 Jambu batu dibelah-belah,
Air halia pula dicari;
Zikrullah itu mengingat Allah,
Ingatlah Dia keampunan diberi.
- 570 Duduk berdua berwajah monyok,
Kepala terkulai merenung batu;
Sudah tua tak mengaku nyanyuk,
Orang menilai tidak begitu.
- 571 Berkejar-kejar ke sebelah timur,
Di situ redup direndangi membatu;
Kena belajar memanfaatkan umur,
Baru hidup tambah bermutu.
- 572 Buah kerdas ubi keladi,
Tepi perigi petik peria;
Pedas-pedas cili padi,
Pedas lagi lidah manusia.
- 573 Buat ringgi letak di sahan,
Dibahagi-bahagi sama Cik Siti;
Tinggi-tinggi Gunung Tahan,
Tinggi lagi harapan hati.
- 574 Biskut gundu berkati-kati,
Seri kaya dijual merata;
Alangkah rindu rasa di hati,
Apakan daya jauh di mata.

- 575 Beli di Rompin pulut dakap,
Cucur badak di kedai rakan;
Ramai pemimpin yang bercakap,
Tetapi tidak pula dikotakan.
- 576 Kopi secawan di Pekan Rabu,
Rasa terharu cara hidangan;
Buat kawan biar beribu,
Buat seteru satu pun jangan.
- 577 Patah lengan dilanggar motokar,
Macam leman patah sendiri;
Hidup dengan perkara mungkar,
Maksiat bergelumang dalam diri.
- 578 Pantai Merdeka tempat berkelah,
Menghilang lara sambil ketawa;
Masyarakat suka hidup berbalah,
Rugi negara rakyat kecewa.
- 579 Getis beluntas pagi hari,
Kemudian ke hulu ke kebun ciku;
Jangan lantas menuding jari,
Periksa dahulu perkara berlaku.
- 580 Atur meja depan kedai,
Budak-budak sakat menyakal;
Berguru sahaja belum pandai,
Jika tidak usaha tawakal.
- 581 Biji semangka buat kuaci,
Pala jeruk sedapnya rasa;
Jangan suka benci-membenci,
Padahnya buruk kepada bangsa.
- 582 Pak Andak pelihara keli,
Burung kuang sama rusa;
Persahabatan tidak boleh dibeli,
Dengan wang ataupun kuasa.